



Stoi ben cuant che chei altris a stan mâl, so redut se soi jo a fâju stâ mâl.

Inutil menâle. Mi plâs fâ dispiets. Ruvinâ lis zornadis. Lassâ un segn di fastidi dulà che o passi.

«Ma dai! Al è picinin... no stâ rabiâti».

E cun cheste frase le ai suiade, e pues bielzà scomençâ a pensâ a le prossime.

Parcè che i volin pensadis, par chê a jessin ben.

Tal fâ dispiets i vûl fantasie, estri, inventive.

I vûl simpri lassâsi une vie par scjampâ e no cjapâ la colpe dal sigûr.

Îr i ai pissât sul cuviertôr dal jet grant, pene cambiât. Cence fâmi viodi, clare. Si son inacuarzûts dal odôr e lis blestemis di Bete lis ai sintudis rivâ fin abàs. Jo o ai fate la solite musute. O ai cjapât un pataf tal cûl, o ai molât un berli, e dopo veli che mi cjarinave il cjâf. Da rest, nol podevie jessi stât gno fradi, o nestre sût?

Setemane passade o ai rabaltât il vâs sul scritori. No lu vevi mai tocjât, ma Gjovani i veve

regalât un mac di sclapons pal aniversari e no ai resistût. Une pocade e vie, aghe su dutis lis cjartis di lavôr. E za che o jeri o ai rabaltât parsore ancje il bussulot des penis. Aghe e ingjustri, duncj. Daspò, la solite musute.

La stesse che i vevi fat cuant che i ai cjolt une cuesse di poleç de padiele e soi lât a platâle sot dal jet. Ancje chi si son inacuarzûts dal odôr.

Ma par cumò la plui biele je stade cuant che il fantacin al è tornât dal concert cu la maie autografade. Soi jentrât di gnot te cjamare, cidin cidin, e je ai fate a tocuts. Il sbrendul plui grant trop che une mê orele. Tant che al à vaiût... Chel sì che al voleve dâmi. Ma jo soi un atôr di gale... solite musute, tirade sù la schene, e vie a ronronâ intor dai siei sghirets.

«Dai, Kevin, no stâ rabiâti... al è un gjat, nol sa mica ce che al à cumbinât», i à dite chê altre inseminide.

di Rafaël Serafin

#1087